

GAZETTE

de 1631



Vous apprendrez par ces deux vaisseaux que nous vous enuoyons chargez de sucre, & autres marchandises, que l'armée de l'Amiral Martin Thys est en la Baya de tous les Saincts, où il attend l'Espagnole composée de trente voiles, qui a paru sous la ligne Equinoctiale: que tous les ports du Bresil, sont occupez par nos navires, & que les forts de Tamaraca, & d'Antoni Vaz, sur le Recif, sont acheuez: comme ie croy vous auoir cy-deuant escrit

De Fernambouc le 17. de Iuillet 1631.

Heles Bacha qui avoit pris le chemin de la rebellion, a desarmé au premier commandement que luy en a fait porter le Grand Seigneur par vn Capitaine de ses gardes. On a icy amené le corps d'Assan Bacha, cy-deuant, General de la mer, & beau-frere du Grand Seigneur. La mort duquel est soupçonnée de poison, aussi n'a-il esté malade que douze heures. Il y a cent ans qu'il n'a point fait icy de si grandes chaleurs comme à present.

De Constantinople le 10 Aoust 1631.

Le Duc de Guise est à Florence. Mille Espagnols ont esté envoyez de Barcelonne à Naples, pour renforcer les garnisons des lieux maritimes, que six Galeres de Bizerte ont espouvanté par les degasts & prises qu'ils ont fait en la Corse. Et toutesfois les Gallions de Naples ont pris deux navires de corsaires qui venoient de la Sardaigne. La Vice-Reyne de Saragosse est morte. Il y a eu broüillerie entre l'Ambassadeur de Venise, & Dom Thadée Barberia, Prefect de ceste ville, à cause de la præsence.

De Rome le 13. de Sept 1631

Il est venu ordre d'Espagne qu'on diminuast le payement des rentes que le Roy Catholique paye aux particuliers, à proportion du dechet & diminution de son revenu, qui est le tiers: où le seul Marquis Homodey perd quinze mille escus de rente, & les autres creanciers à l'equipollent. La dissention des Cantons Catholiques & Protestans ne s'appaise point encore.

De Venise le 17 dudit mois de Septembre 1631.

L'Empereur est à Neustad avec le Palatin de Hongrie. On luy presenta le 6. du courant cinq Cornettes que ses gens avoient gagné sur les Protestans en quelques rencontres passées. Il est arrivé icy vn Ambassadeur du Duc de Sibembourg, qui a fait present à sa Majesté Imperiale d'un cheval richement paré d'or, d'argent, & de belles turquoises. Le but de sa legation est pour se plaindre du Grand Seigneur, & demander secours & conseil contre luy, qui de simple allié qu'il luy est, le veut rendre son tributaire, & l'obliger par la force de ses armes, à renoncer à la bonne intelligence qu'il a avec l'Empereur: étant à ceste fin entré en son pays avec vne puissante armée, qu'il a desia commencé de ranger à la raison en ayant defait & chassé vne partie. On luy envoie le Palatin de Hongrie avec dix mille hommes, ce qui pourra bien troubler la paix d'entre l'Empereur & le Turc, encoretout recente.

De Vienne le 20 dudit mois de Sept. dudit an 1631